

- केंद्रीय गृहमंत्री अमित शाह रो काल जयपुर मांय राजस्थान पुलिस मांय नुवा भर्ती व्ह्या दस हजार सिपाहियां ने नौकरी लागण रा कागजात संपण रो कार्यक्रम।
- मुख्यमंत्री भजन लाल शर्मा चिकित्सा अर स्वास्थ्य हलका रा जाणकारां सागे बजट ऊं पैली री चर्चा कीनी-कह्यो के लारला दो साल मांय स्वास्थ्य ऊं जुड्यो बुनियादी ढांचो मजबूत बणायी ज्यो।
- मुख्य सचिव वी. श्रीनिवास कह्यो-सरकार 4 लाख सरकारी अर 6 लाख गैर-सरकारी नौकरियां रा मौका देवणो तैय कीनो।
- राज्यपाल हरिभाऊ बागडे प्रदेश रा पैली वाळा मंत्री महेश जोशी रे खिलाफ पी.एम.एल. ए. कानून रा तैत मुकदमो चलावण री मंजूरी दीनी।

000

केंद्रीय गृहमंत्री अमित शाह रो काल राजस्थान पुलिस मांय नुवा नौकरी लाग्या दस हजार सिपाहियां ने नौकरी रा कागजात संपण रो कार्यक्रम है। पुलिस महानिदेशक राजीव शर्मा आज जयपुर मांय चाल रह्या राज्य स्तर रा पुलिस सम्मेलन रा दूजा दिन खबरनवीसां सागे बातचीत रे दौरान आ जाणकारी दीनी। वे बतायो के सम्मेलन मांय साइबर अपराधां ने रोकण अर मोटा आयोजनां रा प्रबंध सरीखा मुद्दां माथे जाणकारियां दीरीजी। श्री शर्मा बतायो के नौजवानां ने पुलिस रा काम करण रा तरीका री जाणकारी देवण सारू वां ने पुलिस थाणां रो दौरा करायो जावेला।

000

ई बीचे मुख्यमंत्री भजन लाल शर्मा आज राजस्थान पुलिस एकेडमी रो दौरा कर र काल व्हेवण वाळा नव आरक्षक नियुक्ति समारोह री तैयारियां रो जायजो लीनो अर जरूरी हुकम दीना।

000

केंद्रीय गृहमंत्री अमित शाह आज वर्चुअल तरीका ऊं राष्ट्रीय आई.ई.डी. डेटा प्रबंधन प्रणाली-एन. आई.डी.एम.एस. सरूआत कीनी। वे इण ने देश री अंदरूनी हिफाजत री व्यवस्था मजबूत करण ओड़ी खास कदम बतायो।

000

श्री शाह कह्यो के ई प्रणाली ऊं न्यारी-न्यारी एजेसियां बीचे तालमेल और बेहतर बणेला। गृहमंत्री कह्यो के एन.आई.डी.एम.एस. देशभर मांय आतंकवाद रोधी दस्ता इकाई, पुलिस अर केंद्रीय सशस्त्र पुलिस बलां ने ऑनलाइन डाटा पूगा र वां ने काम लेवण लायक बणावेला।

000

मुख्यमंत्री भजनलाल शर्मा कह्यो है के चिकित्सा अर स्वास्थ्य इंसानियत री सेवा ऊं जुड्यो मुद्दो है अर ई माथे आवता बजट मांय खास ध्यान दियो जावेला। वे आज जयपुर मांय चिकित्सा अर स्वास्थ्य हलकां रा जाणकारां सागे बजट ऊं पैली री मीटिंग मांय बोल रह्या हा। मुख्यमंत्री आवता बगत मांय स्वास्थ्य ऊं जुड्या सुबीतां सारू साधनां री कमी नी आवण देवण रो भरोसो दिरायो। वे कह्यो के राज्य सरकार लारला दो साल मांय प्रदेश रा स्वास्थ्य ढांचा ने मजबूत बणायो है, जिण ऊं गांवां अर ढाणियां तांई जनता ने चोखो ईलाज मिल रह्यो है। मुख्यमंत्री कह्यो के आखा देश सारू मिसाल बणी प्रदेश री 'आयुष्मान आरोग्य योजना' रा तैत 37 लाख मरीजां ने सात हजार करोड़ रुप्या ऊं बत्ता खर्च रो ईलाज मुफ्त दियो ज्यो।

श्री शर्मा कह्यो के प्रदेश मांय 7 नुवा मेडिकल कॉलेज खोली ज्या है अर 15 मेडिकल कॉलेजां रो काम चाल रह्यो है। मुख्यमंत्री कह्यो के बजट ऊं पैली री बातचीत ऊं स्वास्थ्य हलका रा जाणकारां ऊं मिल्या सुझावां ने शामिल कर र जनता ने स्वास्थ्य रा बेहतर सुबीता

मुहैया कराया जावेला। मीटिंग मांय उपमुख्यमंत्री डॉ. प्रेमचंद बैरवा, चिकित्सा अर स्वास्थ्य मंत्री गजेन्द्र सिंह खींवर अर मुख्य सचिव वी. श्रीनिवास ई शामिल व्ह्या।

000

जोधपुर मांय आज माहेश्वरी समाज रो वैश्विक सम्मेलन सरू व्हयो। इण रा उद्घाटन जळसा मांय लोकसभा अध्यक्ष ओम बिरला कह्यो के ओ समाज देश रा विकास अर समाज सेवा रा काम मांय अगाडी रह्यो है।

000

सम्मेलन मांय केंद्रीय मंत्री गजेन्द्र सिंह शेखावत ई कह्यो के ओ समाज भणार्ई-लिखाई अर सांस्कृतिक विरासत ने आगे बधावण मांय खास काम कीनो है।

000

सम्मेलन मांय 27 देशां रा करीब 40 हजार नुमाइंदा शामिल व्हे रह्या है। केंद्रीय गृहमंत्री अमित शाह रो ई काल अधिवेशन मांय शामिल व्हेवण रो कार्यक्रम है।

000

सूचना अर प्रसारण मंत्री अश्विनी वैष्णव राज्यमंत्री डॉ. एल. मुरुगन सागे आज नई दिल्ली मांय क्रिएटर्स कॉर्नर रो उद्घाटन कीनो। प्रसार भारती री ई पहल रो मकसद डिजिटल प्लेटफॉर्म माथे रचनात्मक सामग्री रो दरसाव कर र वां ने बधावो देवणो है। कार्यक्रम मांय श्री वैष्णव कह्यो के सरकार एक करोड़ नौजवानां ने माली व्यवस्था ऊं जोड़बो तैय कीनो है।

000

राज्य सरकार नौजवानां सारू 4 लाख सरकारी अर 6 लाख गैर-सरकारी नौकरियां मुहैया करावणो तैय कीनो है। मुख्य सचिव वी. श्रीनिवास आज जयपुर मांय कौशल, रोजगार अर उद्यमिता विभाग रा अहलकारां री मीटिंग मांय आ जाणकारी दीनी। वे प्रदेश मांय आई.टी.आई. ने कारखानां सागे जोड़बा रा हुकम दीना।

000

राइजिंग राजस्थान समिट' रे दौरान व्ह्या निवेश ऊं जुड़्या न्यारा-न्यारा करार रा तैत खेती-बाड़ी, स्वास्थ्य अर खनन सरीखा हलकां मांय करोड़ों रुप्या मोल री परियोजनावां माथे काम सरू व्हे रह्यो है। खेती-बाड़ी हलका मांय सात हजार करोड़ रुप्या ऊं बत्ता निवेश ऊं सामान भेळो करण अर वां ने और बेहतर बणावण ऊं जुड़्यो ढांचो मजबूत बणेला। ईलाज अर आयुष रा हलका मांय 12 हजार करोड़ रुप्या री परियोजनावां ऊं अस्पतालां रा बूता अर सुबीतां मांय सुधार व्हेला। खनन हलका मांय 33 हजार करोड़ रुप्या ऊं बत्ता खर्च वाळी 30 परियोजनावां सरू व्हेवण ऊं मकामी बाशिन्दां सारू काम-धंधा रा मौका बधेला।

000

राज्य रा पैली वाळा मंत्री महेश जोशी रे खिलाफ मुकदमो चलायो जावेला। राज्यपाल हरिभाऊ बागडे इण री मंजूरी दे दीनी है। महेश जोशी रे खिलाफ जन स्वास्थ्य अभियांत्रिकी विभाग मांय धन शोधन निवारण कानून-पी.एम.एल.ए. रा तैत पहली निजर मांय अपराध रो मामलो बणबा पाछे राजभवन री ओर ऊं आ मंजूरी दीरीजी है।

000

लारला चौबीस घंटां मांय जयपुर संभाग मांय कठे-कठे व्ह्या छांटा-छिड़का ऊं सिंयाळा रो असर घणो बध ग्यो है। पिलानी अर झुन्झुनू मांय 4 दशमलव 2 मिलीमीटर बारिश व्ही। केई ठौड़ां घणी धुंअर रही। तेज ठंड ऊं इन्सानां सागे परिन्दां अर ढांढा-ढोरां ने ई परेशानी व्हे रही है। तेज ठण्ड ऊं पशुआं रा बचाव सारू पशुपालन विभाग री ओर ऊं एडवाइजरी जारी करी ज्यी है। पाली मांय पशुपालन विभाग रा सहायक निदेशक डॉ. मनोज कुमार बतायो के तेज सर्दी ऊं पशुआं ने बचावण सारू तिरपाल ताण्या जावणा चाहिजे।

000

मौसम विभाग रे मुजब राज्य रा घणखर हलकां मांय आवता सप्ताह मांय राज्य रा ऊगणी, आतूणी अर उतराद हलकां मांय आवता दो-तीन दिन घणी धुंअर रेहवण रा आसार है। ई सागे ई प्रदेश रा उतराद हलकां मांय पारो एक-दो डिग्री सेल्सियस और उतरण री संभावना है।

0000